

Promer Ministro Eman

E DAÑO CU ARUBA A SUFRI INTERNACIONALMENTE TA PRODUCTO DI GOBIERNO DI NELSON ODUBER

ORANJESTAD(AAN) -- Relaciona cu e declaracion di Parlamentario Nelson Oduber, Promer Ministro Eman a duna su reaccion.

Ta asina cu Parlamentario Nelson Oduber entre otro a indica cu el a pasa berguenza cu Promer Ministro Eman na Hulanda. Segun Oduber, Eman kende a bisa cu e tin hopi contacto a resulta cu na Hulanda ningun hende no conoce.

Tambe Oduber a acusa Eman di a laga narcotraficantenan drenta Aruba durante 1988 - 1989 y cu tin bukinan ta indica cu den e temporada ey e promer encuentro entre Maffia y Cartel di Medellin a tuma lugar na Aruba.

Promer Ministro Eman a duna di conoce cu e declaracion di Nelson Oduber ta splica bon cla pa kico Eman a sinti un berguenza grandi na Hulanda.

Eman a sigui bisa cu atrobe por mira con Nelson Oduber ta lansando insinuacionnan no solamente contra Gobierno pero tambe contra Aruba.

Gobierno AVP/OLA ta lamenta cu aparentemente ainda Nelson Oduber no a siña.

Segun Promer Ministro Eman, e daño cu Aruba a sufri internacionalmente, a worde ocasiona door di Gabinete Oduber I y II durante e periodo di gobernacion di 5 aña y mey.

Eman a indica cu na October 1993, ey Nelson Oduber mester a bay Hulanda pa oficialmente pone e Gobierno di Oduber bao curatela. Lubbers, Ballin y Eman a firma un protocol pa pone Gobierno di Nelson Oduber bao curatela pasobra e no tabata por a goberna e pais.

Oduber simplemente a causa un chaos ariba tereno financiero y internacionalmente gobernacion di

Oduber a cuminsa causa Aruba un daño grandi.

Eman a sigui bisa cu Gobierno AVP/OLA ta trahando ariba patruya nos costanan pero esaki tabata funcionando caba na '88 - '89 pero a worde termina pa Gobierno Oduber.

Promer Ministro a indica cu na '88, Gabinete Eman tabata tin patruya pa nos costanan pa asina segura cu Aruba ta cera pa eventual criminalidad internacional.

A traha ariba e patruya di nos costanan e tempo ey hunto cu Hulanda y Merca pa segura cu Aruba tabata sigur. Oduber su Gobierno a tuma over y dos dia despues e patruya di nos costanan a worde elimina pa e Ministro di Husticia di e tempo ey y ta e mesun Ministro di Husticia ey a duna permiso na tur esnan cu Oduber a menciona den su declaracion cu lo tabata na Aruba.

Eman a sigui bisa cu e falta di organisacion, diciplina y

regla cu a conoce aki na Aruba, mescos tabata e caso na Hulanda. Segun Eman, no tabatin representacion di Aruba na Hulanda. Pa lunanan largo no tabatin un Ministro pa participa na Rijks Ministerraad.

Pa lunanan largo Aruba-huis a worde poni poco poco den un skina y no ta importante mas.

Segun Eman, esaki no ta kita cu uno por tin relacion personal cu Ministranan di Hulanda, pero esaki no ta refleha e imagen di e pais Aruba.

Eman a bisa cu ora el a bay e entiero di de Koning na Hulanda e por a nota y sinti cu loke e Hulandesnan ta pensando di Aruba no a crece durante e 7 simannan cu Gobierno AVP/OLA ta sintando, sino a crece durante e ultimo 5 aña y mey di Gabinete Oduber I y II.

Eman a enfatisa cu dia el a baha como Promer Ministro na 1989, el a entrega Oduber

un Aruba economicamente fuerte y cu tabata creciendo. E tempo ey Aruba tabata ehempel internacional con por maneha un pais. Notable ta cu durante 5 aña y mey no solamente Gobierno di Nelson Oduber a lansa un cantidad di acusacion contra AVP pero a haci esfuerzonan pa purba di gara un di e hendenan di AVP den cualkier cos irregular. Mi-yones a worde gasta pa busca Polis Hulandes, pasobra te awe Oduber no por kere cu AVP a rescata e pais manera tabata e caso na '88 - '89 sin cu a mishi cu placa di pueblo manera Gabinete Oduber I y II a haci.

Eman ta haya cu e expresionnan di Oduber ta obliga Gobierno AVP/OLA investiga profundamente pasobra ainda Oduber no a sinti cu loke nan a haci a causa Aruba daño.


Eman ta di opinion cu ta irresponsable pa e autor di e chaos na Aruba, kende a



causa cu internacionalmente Aruba ta mal mira, ainda tin e briyo di papia manera e ta papia como si fuera nada no a pasa.

Eman a expresa cu e lo traha duro, dia y anochi, pa dia cu e mester entrega su pais na esnan cu ta tume over, e por hacie cu e mesun orguyo cu el a hacie na 1989, caminda tur Arubiano tabata sinti nan mes orguyoso di nan pais.

LOS ANGELES NEGROS!!!



TELEFONNAN
DI DIARIO
26747
FAX
28551